

每週經課朗誦經文(巴克禮台語漢字)2013/04/21

共同經課 - 1 使徒行傳九章三十六節~四十三節

36 佇約帕有一個女徒，名大比大，翻譯就是多加；行好事及賑濟滿滿。37 當時，破病死，人洗伊的身屍，下佇樓頂。38 呂大近約帕；學生聽見彼得佇遐，就差二人去尋伊，求講：「請來阮遮，毋通延延。」39 彼得就起身及in去；已經到，導伊上樓。眾守寡人倚佇彼得的身邊啲哮，將多加及in佇啲的時所做的衣服互伊看。40 彼得就教眾人出去，跪落去祈禱，越轉身向身屍講：「大比大，起來！」伊的目睷展開，看見彼得，就起來坐。41 彼得伸手扶伊起來，叫諸個聖徒及守寡人入來，將復活的多加交互in。42 通約帕攏知，就有多多人信主。43 彼得佇約帕久久及一個鞞皮師傅西門相及住。

共同經課 - 2 詩篇二十三篇

1 〔大衛的詩。〕耶和華是我的牧者，我無欠缺。2 伊互我倒佇青翠的草埔，導我佇安靜的水邊。3 伊互我的靈魂精英，為著伊的名導我行義的路。4 我雖然行過死蔭的山谷，亦毋驚災害，因為你及我佇啲；你的槌，你的枴，安慰我。5 佇我對敵的面前，你給我排設筵席；你用油抹我的頭殼，我的杯滿出來。6 恩典及慈悲的確隨我到一世人；我欲永遠倚起佇耶和華的厝。

共同經課 - 3 啟示錄七章九節~十七節

9 諸個代誌了後，我看見有歸大陣的人，無人會算伊的數額，出佇逐國、逐族、逐號百姓、逐樣腔口的，倚佇座位的面前，穿白衫，手抬棕樹枝，10 大聲叫講：「願拯救歸佇咱的上帝，就是坐座位的及佇羊羔！」11 眾天使倚佇座位及長老及四個活物的周圍，面仆佇座位前，敬拜上帝，12 講：阿們！願謳嘍、榮光、智慧、感謝、尊貴、權能、氣力歸佇咱的上帝，到代代無盡。阿們！13 長老的中間有一個應我講：「諸個穿白衫的是是誰？對叨落來啊？」14 我給伊講：「我的主啊，你知。」伊給我講：「諸個是對彼個大的患難出來的，曾佇羊羔的血洗in的衫到白白。15 所以，in佇上帝的座位前，閣佇伊的殿暝日服事伊。坐佇座位的欲倚起佇in的中間來致蔭in。16 in無閣枴，也無閣嘴乾，日及一切的熱袂焮著in。17 因為座位中的羊羔欲做in的牧者，導in到活的水泉；閣上帝欲對in的目睷拭去in攏總的目屎。」

共同經課 - 4 約翰福音十章二十二節~三十節

22 佇耶路撒冷有獻殿節，是冬天時。23 耶穌佇殿裡，行佇所羅門的兩廊。24 猶太人圍攏，來給伊講：「你互阮的心躊躇欲到甚麼時啊？你若是基督，著明明給阮講。」25 耶穌應講：「我曾給恁講，若是恁毋信。我佇我的父的名所行的事諸個是做我的干證；26 若是恁毋信，因為恁毋是我的羊。27 我的羊聽我的聲，我識in，in亦隨我。28 閣我互in有永活；in決斷永遠袂沈淪，無一個會對我的手搶in去。29 我的父就是用羊互我的，卡大萬項有，無一個會對父的手搶去。30 我及父是一個。」